

Je'ej ti tyo'yú'xaca' a'íjna i San Pablo a'íjma jimi i maj Colosas jo'cháatima'caa

Pablo pu hua'tyojtye'

¹ Nyáaj Pablo, nyáaj nu tyí'huiire' i Ciríistu' jimi, ji'nye a'yaa pu tya'ránajchaca' i Dios, nyajamuan a'íjna i nye'ihuáara' Timoteo, ² a'yaa tu já'muatyojtye' mua'ajmaj mu siaj Colosas ja'chej, siajta tyámua' tyúu'ihuaamua' i Ciríistu' jimi. Che' i Dios i tyaj jajvástara' tyámua' tya-jamuáacha'íin, ajta tyámua' jamuáa'uurej mu ja'muaxiéjnyu'caa tzajta'.

Pablo pu tyé'tyojtzi're' i Dios ajta huá'huaviitze' i maj tyá'tzaahuatye'

³ Tyati'íjtá huatyényuunyij tyajta tu tyé'tyojtzi're' i Dios ja'mua jime', i vástaria'ra' a'íjci i tavástara' i Jesús ti ajta Ciríistu' pué'een. ⁴ Ji'nye a'yaa tu tyáamua'reeri' siaj tyá'tzaahuatye' i Ciríistu' jimi, siajta jéehua hua'xie've' i maj majta tyá'tzaahuatye' i Dios jimi, ⁵ a'yaa xu ricij seejcho'va'aj je'ej ti arí mua'ajmaj tyajamuaaci'ij u tajapuá. A'íj xu mua'aj serij huánamuajri' i nyúucarij ti ji'ré'can jime' tzáahuatyí'ra'aj jin jaxaj i Dios ⁶ i ti'ij ajta ja'mua jimi huataséjre. A'íjna i nyúucarij a'yaa pu ti'ij i ciyéj ta'ajhuóse'sij, ajta je'en huatatáque'sij néijmi'que' íiyan i cháanacaj

japua, a'yájna ti'ij huaríj ja'mua jimi siati'ij jáanamuaajri' i ti jin jéehua já'muaxie've' i Dios siajta jaamua'aj i ti ji'r'é'can jime' a'íjna jimi. ⁷ A'yaa pu tyajamuaamuá'tyej a'íjna i Epafras, i ti tajamuán tyí'muarie' siajta a'yan tyá'mua'reej ti tyámua' naa tyí'huüre' i Ciríistu' jimi. ⁸ A'íi pu arí taaté'exaa je'ej ti tyaja'muahüire' ajta siaj jéehua juxie've' a'íjna jime' ti i júuricama'ra' i Dios já'muahüire'.

⁹ A'íj tu jin ityáj, tyati'ij jáamua'reeri', catu a'náj jaatapuá'cítaca' tyaj jahuoocaj i Dios jimi tyajta a'yan tyá'huaviij ti a'íin jamuáamua'tyej je'ej ti tya'ajxié'vi'ra' siaj sij néijmi'i jo'itéej xá'ra'nyij ajta siaj sij jáamua'reej je'ej ti tyí'een i júuricama'ra' jimi i Dios. ¹⁰ A'yaa xu tyámua' tyityetyúucha'ij xá'ju'un mati'ij i maj tyeítyeristyamua'me'en pué'een i tavástara', siaj sij a'náj tina'aj tyámua' eenye' siajta a'yan huárinyij je'ej ti tya'ránajchi i tavástara', siajta a'yan eenye' ti'ij ciyéj ti ajhuóose'sij ajta je'en antatáque'esij, a'íjna jime' siaj jamua'tyej i Dios. ¹¹ A'yaa tu tyá'huaviij ti a'íin jamuaata'an néijmi'i i ca'nyíjra'aj i já'muatzajta', siaj sij a'íj jitze arooca'nyáaj setyo'táviicue', siajta jacho'va'aj je'ej ti tyi'tíj já'mua'uurej, siajta je'en a'íjna jin huatóotyamua've'en, ¹² aj xu sij tyaatatyójtzi're'ej i tyaj jajvástara', i ti jamuaatá' siaj sij ja'ancuriá'an a'íjci i ti já'muaci'tyij a'ájna jo'tíj a'náj tina'aj jó'nyeri'ij je'ej ti a'íin tyihuo'tá'sij i jutyéityeristyamua'. ¹³ Dios pu tajapuá huatanyúj a'ájna jo'tíj jo'tíca', ajta je'en tojo'ví'tíj jo'tíj tyejé'ijtaj a'íjna i yójra'

ì ti huápuì'ij jaxie've', ¹⁴ a'íi pu tyu'nájchitaca' ì tyaj jin tyé'cha'íica'aj ì Dios jimi, a'íjci jime' ì ti yójra' tajíme' huamuí', ti'ij tyitaatú'uunyi' ì tyaj jin á'itzeeria'ca'aj.

Dios pu taataxié'vej a'íjci jime' ti ì Ciríistu' tajitzé ma'can huamuí'

¹⁵ Ciríistu' pu a'íin pué'een ì tyaj jin jáamua'reej je'ej ti een ì Dios ì tyaj quee jaséj, a'íi pu ajta a'íin pué'een ì ti anaquéej séjria'ca'aj ti'ij quee xu maja'tyi'títacaj. ¹⁶ Dios pu ì Ciríistu' jimi néijmi'i tyú'taahuaca' ti'ij na'aj pua'máj tyí'sejre' u tajapuá ajta íyan ì cháanacaj japua, néijmi'i ì ti tyí'sejre' ajta ì ti quee tyí'sejre', ajta ì júuricamej ì maj néijmi'que' tyí'ijta. Dios pu néijmi'caa huátaahuaca' mej mij a'íj jitze ajtyáma'cantaj. ¹⁷ Ciríistu' pu'ríj séjria'ca'aj ti'ij quee xu majá'tyi'títaca'aj, ajta ì ti tyí'sejre' a'íj pu jitze néijmi'i tya'róoca'nyej. ¹⁸ Ajta ì Ciríistu' pu a'íin pué'een ì hua' mu'uj ì maj jusi'rii ì tyeyúuj tzajta' ì ti ajta tyévira' pué'een. A'íi pu a'íin pué'een ì ti jájcuaj ímuáj séjria'ca'aj, ì ti anaquéej huatájuuriaca', ti'ij a'íin pue'éenye'ej tá'ra'nyij ì ti néijmi'i jin antyúumua'reej. ¹⁹ Ji'nye a'yaa pu tya'ránajchaca' ì Dios ti ì Ciríistu' jimi séeria'aj tá'ra'nyij ì ti jin néijmi'i putyí'uurej, ²⁰ ajta ì Ciríistu' jitze ma'can Dios pu néijmi'caa tyámua' tyu'tyéje mej mij jitzán huatyá'itzeere'en, mati'ij mana'aj a'íijma ì maj tajapuá já'sejre', majta ì maj a'yan séejre' ì cháanacaj japua, a'íi pu tyámua' huó'ruuj a'íjna jime' ti ì Ciríistu' ì juxúure' eeráaxirej ì cúruuj jitze.

21 Anaquéej xu mua'aj a' imuáj já'ma'cantaca'aj i Dios jimi, siajta jájcha'iiria'ca'aj i jutzájta', a'íjna jime' siaj je'ej tyityetyúucha'iica'aj, 22 ajta ijíj i Ciríistu' pu tyámua' jamuáaruuj ti'ij huamu' i cúruuj jitze, ajta jaapuéjtzitariaca'. A'yaa pu'ij huaríj ti'ij jamuá'anvi'tin i Dios jimi, siajta je'en jimi huatyá'itzeere'en, tyámua' sia'éenya'aj, siajta quee che' tyi'tíj jin á'itzeeria'aj, capu ajta a'tíj ja'mua jitze tyi'tíj jin tyi'puá'ritye'ej ta'mej. 23 A'yaa pu tyúuxie've' siaj tyámua' naa tyá'tzaahuatye'ej, siajta quee yó'hua'nan i siaj jajchó've' a'yájna ti'ij tyá'xaj i nyúucaria'ra' i Dios i siaj jáanamuaajri'. A'íi pu a'íin pué'een i nyúucarij i maj meríj huó'ixaaj néijmi'que' i cháanacaj, i nyaj nyáaj Pablo a'íjna jin tyí'huire' nyej nyij huo'r'é'ixaatye'en.

Pablo pu huá'ixaatye' i nyúucaria'ra' i Dios a'íjma i maj séej chuéj japua já'ma'can

24 Ijíj nu nyetyamua've' a'íjna jime' i nyaj jin japuéjtzitarej ja'mua jime', ji'nye a'yaa nu tyá'nejmi'tare' a'íjci i nyahue'ra' jitze i ti á'itzeere' i Ciríistu' ti jin jaapuéjtzitariaca', nyáaj nu a'yan rinyij a'íjna jitze i tye'ityeristyamua'me'en jimi i maj tyévira' pué'een. 25 Dios pu a'íjna naata'íj nyej nyij huo'tyáhuire'en i maj jusi'rii i tyeyúuj tzajta', a'yaa pu tyinaa'íjcaj nyej nyij tyámua' jamuáa'uurej, nyajta huo'r'é'ixaatye'en néijmi'que' i nyúucaria'ra', 26 a'íjna i nyúucarij, i ti ju'avaataca'aj i Dios jimi ti'ij na'aj ajca'huá' imuáj ajta yatíj je'r'é'nyej,

i ti ijij arí huó'ixaaj jéjre'citze' a'íjma i maj tyá'tzaahuatye'. ²⁷ A'íimaj pu i Dios huataséjratyej i ti naa huasé'rin jimi, i maj majta jin huatóotyamua've'sij, ajta a'íjna jin jamuaatyécha'íisij néijmi'caa jimi i maj quee Israel jitze ajtyáma'can. A'íjna i ti ju'avaataca'aj a'íi pu a'íin pué'een i Ciríistu', i ti ja'mua jimi séejre', i siaj siajta jajchó've' i ti naa huasé'rin tí'ij ja'mua jimi séeria'aj tá'ra'nyij.

²⁸ Ityáj tu tyihuá'ixaatye' i Ciríistu' jitze ma'can, tyámua' tyetyihuá'ixaatye'ej tyajta tyihua'mua'tyéé mej mij jáamua'reej tzaahuatyi'ra'aj jime' i ti a'yan tyi'ja'yájna, mej mij tyámua' éenye'ej huatóosejrata i Ciríistu' jimi. ²⁹ A'íj nu jin ca'nyíin tyí'muarie', nyajta a'yan tyí'nyo'se' néijmi'i jime' nyajta a'íjna jime' i Ciríistu' ti jin néijmi'i putyí'uurej.

2

¹ A'yaa nu tyá'xie've' siaj jáamua'reej nyaj jéehua ja'mua jime' nyo'se', nyajta hua' jime' i maj Laodicea ja'chej, nyajta hua' jime' i maj quee a'náj naaséj nye tyévira' jitze. ² A'yaa nu ricij mej mij a'íimaj huatyóoca'nyej i jutzájta', mej mij majta tyámua' tyuu'ihuáamua'aj muá'ra'nyij, majta huóoxie've'en, tí'ij huo'ci'tyij i maj jin yo'itéej muá'ra'nyij néijmi'i i ti ju'avaataca'aj i Dios jimi, i ti a'íin pué'een i Ciríistu', ³ ji'nye a'íj pu jimi néijmi'i tyí'sejre' i ti tyúuxie've' tyej tyij tyámua' metyityoomuámua're'ej tyajta néijmi'i tyojo'itéej tá'ra'nyij. ⁴ A'yaa nu mua'ajmaj tyajá'mua'ixaatye', ta'aj ij quee a'tíj

já'muacuanamuaj a'íjna jime' i nyúucarij ti naa namuajre'. ⁵ Tyij nyequee nyajta ja'mua jamuán ajo'tyéjvee, nyaj júuricamej pu ja'mua jimi séejre', a'íj nu jin nyetyamua've' nyaj jáamua'reej siaj tyámua' tyityaajú' a'íjna jime' siaj tyá'tzaahuatye' i Ciríistu' jimi.

I júuricamej ti jájcuaj i Ciríistu' jimi

⁶ A'íj pu jin, mua'aj mu siaj seríj ja'antzaahuaj i Ciríistu' tí'ij juvástara', a'yaa pu tyúuxie've' siaj sij a'yan tyityetyúucha'íj matí'ij i maj Ciríistu' jimi séejre', ⁷ siaj sij a'yan eenye' tí'ij i ciyéj tí tyétye' imuáj jo'canána'ajmee, a'íjna jitze xuuca'nyéej i siaj jitzán tyá'tzaahuatye', a'yájna matí'ij tyajamuamuá'tyej, siajta a'náj tina'aj tyé'tyojtzi're'ej i Dios.

⁸ Tyámua' xu'uj mua'aj, caxu tooa'care'en maj já'muacuanamuaj i nyúucarij jime' ti hue'tzij pué'een, jí'nye camu a'íimaj Ciríistu' jimi jo'vá'ju', sulu a'íj mu huá'ixaatye' je'ej maj jujímua'aj tyéejtyoj, majta a'íjna jin tyí'mua'taj íiyan tí tyí'ma'can cháanacaj japua.

⁹ Jí'nye néijmi'i i Dios tí jimi tyajá'ma'can, a'íj pu jimi tyí'sejre' i Ciríistu', ¹⁰ ajta i Dios a'íj pu jitze néijmi'caa tyámua' já'mua'uurej, jí'nye i Ciríistu' pu antyúumua'reej a'íjma jimi i júuricamej i maj tyí'ijta, majta tyí'tíj jin tyityetyu'uj. ¹¹ A'íj xu siajta mua'aj jimi seríj ja'rá'astee a'íjci jime' i maj ja'antysisí'chej i junavíj, i Dios tí jin a'yan jamuáaruuj siatí'ij jimi ajtyáhuixíj i Ciríistu', ajta tyajamuacáa'ri'ri' i siaj jin je'ej pua'aj rijcaa. ¹² Siatí'ij huái'huaca', aj xu siajta jamuán avá'nami'huaca' i Ciríistu',

siajta je'en jamuán huatájuuriaca', jì'nye mua'aj xu ja'antzaahuj a'íjna ì Dios tì néijmi'i jìn putyí'uurej tì'ij jaatájuurityej. ¹³ Jájcuaj imuáj pu muí'chica'aj ì ja'mua júuricamej a'íjna jìme' ì siaj jéehua je'ej pua'aj rijcaa, ajta ijíj ì Dios pu'ríj ì júuricamej jamuaatá' jamuán ì Círíistu', ì tì ajta néijmi'i tyitaatú'uunyi'ri' ì tyaj jìn ootyá'itzee. ¹⁴ Dios pu jo'úuj ì tì á'yu'si'huaca'aj ì tyaj jìme' tyé'cha'íica'aj ì tì ajta ca'nyérij jìn tyí'ta'íjtya'ca'aj, a'yaa pu tye'entyipua'riaca' tì'ij óotateehuaca' ì cúruuj jítze, a'íjna jamuán ì Círíistu'. ¹⁵ Dios pu tyihuáa'ri'ri' ì maj tyity-atatyá'ca'aj ì júuricamej maj je'ej pua'aj een, ajta ì Círíistu' jimi huo'tatyévi'raste jéjre'citze' tì'ij eetyájra hua'najáapuaaj ì tì huo'mué'tíj.

Maj tyú'huoonyij a'íjci ì jútye' tì tyajá'ma'can

¹⁶ A'íj pu jìn, che' quee a'tíj je'ej tyaja'muaxajtaj je'ej siaj tyi'tíj tyí'cua', na'ríj je'ej siaj tyí'tyeye', nusu a'íjna xicáara' tì jítzán a'yaa tyúuxie've' siaj tyú'ye'estej tì'ijta tyo'tyé'iten ì máxcirie', na'ríj tì'ijta tya'rá'astij a'náj maj juso'pii. ¹⁷ Néijmi'i a'íjna a'yaa pu mua'ajmaj tyaja'mua'uurej, ajta a'yan tyí'huiire' tyej tyij jáamua'reej je'ej tì yatyojooméj, ajta ì tì jì'récán jìme' a'íi pu a'íin pué'een ì Círíistu'. ¹⁸ Caxu tooa'care'en mej mij je'ej pua'aj já'mua'uurej a'íimaj ì maj a'yan tyúusejrataj mati'ij ì maj quee tyi'tíj jìn tyityetyu'uj, majta a'íimaj najchej ì maj tyí'huiire' u tajapuá, a'yaa mu majta tyí'xaj maj nu'uj tyi'tíj tyí'sej, a'íi mu mij jéehua jìn óotzaahuatye' ì tiquee tyi'tíj huiire'. ¹⁹ Camu a'íimaj a'íj jítze ajtyáma'can

i Ciríistu', i ti néijmi'i ve'sij i tyaj jatyáhue'ra'
 ajta tyá'cue'tyej, tyej tyij néijmi'i jitzán séjre'ej
 tí'ij i Dios tyá'xie've'. ²⁰ Xu'ríj mua'aj huácuij
 i Ciríistu' jamuán a'íj mu jin quee che'
 tyajá'mua'ijtye' i maj tyí'ijta íyan i cháanacaj
 japua. ¿Ji'nye een jime' siaj sij a'yan cha'taj
 siana'aj ricij mati'ij a'íimaj i maj a'yan ma'can
 i cháanacaj japua? A'yaa mu tyajá'mua'ijtye'
²¹ tyi'tíj jime' tí'ij: “Capáj jamuarie'ej, capáj
 jacua'caj, capáj jí'tyáa'aj mua' muáca' jitze”.
²² Néijmi'i i nyúucarij ti a'yan tyí'ijta a'yaa pu
 ajta tye'entyipué'rij, jí'nye tye'ítyee mu' a'yan
 tyí'ijta majta a'yan tyihúa'mua'tyej. ²³ A'yaa pu
 tyi'ja'yájna ti a'yan huasé'rin tí'ij i ti xá'puí',
 jí'nye tzáahuatyí'ra'aj mu jin a'yan ricij majta
 quee óotzaahuatye', a'yaa mu majta ca'nyíin
 jin ricij, ma' ajta quee capu tyi'tíj huiire', sulu
 a'yaa pu'uj tyí'huiire' mej mij jujímua'aj a'íjna
 jin ahuóotzaahuatye'en.

3

¹ A'yaa pu'ij, mua'aj mu siaj seríj hu-
 atájuuriaca' jamuán i Ciríistu', siata'aj a'íj
 tyú'huoonyij i tajapué ti tyejé'sejre', jo'tij i
 Ciríistu' muáca'ta' ja'ajcájcaj i Dios. ² Siata'aj a'íj
 jitze tyú'mua'tyij tajapué ti tyejé'sejre', caxu a'íj
 jitze tyí'mua'ajcaj íyan ti tyí'ma'can i cháanacaj
 japua. ³ Ji'nye mua'aj xu'ríj huácuij i Ciríistu'
 jamuán, ajta i Dios pu jamuaatá'sij siaj sij i
 Ciríistu' jamuán ja'séeria'aj xá'ra'nyij. ⁴ Ciríistu'
 pu a'íin pué'een i já'muajuuricamej. Tí'ij a'íin

yan huataséjre'en, mua'aj xu siajta jamuán hu-
 ataséjre'ej tyámua' sia'énya'aj.

*I júuricamej i ti arí mí'ma'can ajta i ti jájcuaj
 i Cirístu' jimi*

⁵ Siata'aj jaatapuá'citaj néijmi'i i ti je'ej
 pua'aj een i ti ja'mua jitze séejre', che' quee
 a'tíj juxana'ciria'aj, caxu tooa'care'en ti tyaja-
 muaata'íjtye'ej i ti ja'mua tzajta' eerányinyii,
 caxu che' jahuocaj i ti ja'mua jitze juxie've' ti
 ajta je'ej pua'aj een, siajta quee tyí'nyacua'tzaj,
 ji'nye i Dios jimi a'yaa pu een ti'ij i a'tíj ti
 jana'michej i ti quee Dios pu'éen. ⁶ A'íj mu
 jime' néijmi'i jin jajpuéetzij muá'ju'un i maj
 quee já'astijre' i Dios, ⁷ siajta mua'aj a'yaa xu
 anaquéej éenye'ej tyá'astyajca'aj siajta néijmi'i
 jin a'yan rijcaa. ⁸ Ajta ijíj, a'yaa pu tyúuxie've'
 siaj néijmi'i tyu'tapuá'citaj, caxu nyinyu'cacuj,
 caxu a'yan rijcaj je'ej ti ja'mua jitze tyúuxie've',
 caxu tyí'tíj je'ej pua'aj uuriaj, caxu je'ej pua'aj ty-
 ihuá'xajtaj i tyeítyee nusu siaj mua'aj je'ej pua'aj
 tyí'xajtaj. ⁹ Caxu jucuanamuaj séej jamuán
 siajta séej, ji'nye xu'ríj tyu'tapuá'citaca' i siaj jin
 je'ej pua'aj aamí' tyityetyúucha'íica'aj, siajta i
 siaj jin je'ej pua'aj rijcaa, ¹⁰ siajta seríj jájcuaj
 jin tyu'tyóochejtyej, Dios pu jamuaajájcuarej i
 ja'mua tzajta', siaj sij a'yan éenye'ej xá'ra'nyij
 ti'ij a'íjna i ti jamuáataahuaca', siaj sij tyámua'
 naa tyáamua'tyij. ¹¹ Capu che' juxie've' tipua'aj
 síj Griego pu'éeenye' nusu Israel jitze aj-
 tyáma'cantaj, tipua'aj aróo'astej a'íjna jime' ti
 ja'antysisíjchaca' i junavíj nusu quee, tipua'aj
 séej i chuéj japua ja'chajca, nusu séej jimi

tyí'muarie'ej, na'ríj juxáahuaj jo'cha'can, sulu a'íi pu i Círíistu' a'íin pué'een i ti juxie've' tí ajta néijmi'caa jimi huatyá'itzeere'en i jutyéityeristyamua'.

¹² Dios pu mua'ajmaj já'muaxie've' ajta a'íin jamua'antýíhuoo siaj sij jitzán ajtyáma'cantaj xá'ra'nyij. Siata'aj hua'cu'vej i juxa'aj tyeítyee, siata'aj tyámua' tyihuó'cha'íin, caxu óotzaahuatye'ej, sulu siata'aj tyámua' eenye' siajta tyo'táviicue' tipua'aj tyi'tíj je'ej já'mua'uurej.

¹³ Siata'aj tyo'táviicue' séej jamuán siajta séej, siajta tyu'túu'uunyi' tipua'aj síj jájriaaxiejtye'en i juxa'aj tyévi. A'yájna tí'ij i tavástara' tyajamuaatú'uunyi'ri', a'yaa xu sij siajta mua'aj tyu'túu'uunyi' séej siajta séej.

¹⁴ Ajta a'yájna siata'aj a'íjna ucóochejtye'en i siaj jin huóoxie've'en, jí'nye a'íi pu a'íin pué'een i ti naa een. ¹⁵ Ajta i Círíistu' tí jin tyámua' jamuáaruuj che' a'íin ú'sejria'aj i ja'mua tzajta', jí'nye a'íj pu jin jamuaatajé i Dios siaj sij séej tyévira' siana'aj pué'eenye'. Siajta tyaatatyójtzi're'en i Dios.

¹⁶ Che' i nyúucaria'ra' i Círíistu' a'náj tina'aj ja'mua tzajta' séjre'ej néijmi'i jime' i ti jéehua tyí'huíire'. Siata'aj huatóohuíire'en séej jamuán siajta séej, siaj sij jáamua'reej je'ej siaj tyihuó'ixaatye'en néijmi'caa amitéeria'can jime'. Siata'aj chuícarij jime' tyaatatyójtzi're'en i Dios, néijmi'i xu i ju júuricamej jin tyu'táchuúicaj.

¹⁷ Ajta néijmi'i je'ej siaj tyi'tíj uurej nusu je'ej siaj tyí'xaj, a'yaa xu huárinyij néijmi'i jime' i nyúucaritze' i tavástara' a'íjna i Jesús, siajta

tyaatatyójtzi're'en i Dios i tyaj jajvástara' a'íjna jítze ma'can i Ciríistu'.

Je'ej maj tyityetyúucha'íij i maj tyá'tzaahuatye' a'íjma jimi i tyeítjee

¹⁸ Mua'aj mu siaj huíichej, siahua'rá'astijre' i ju'cínastyamua', ji'nye a'yaa pu tyúuxie've' maj a'yan huárinyij i maj tyá'tzaahuatye' i tavástara' jimi. ¹⁹ Siajta mua'aj mu siaj nyejnyeí'chej, siata'aj huo'xié've'en i ju'irástyamua', caxu je'ej pua'aj tyihuá'jeevej.

²⁰ Siajta mu siaj hua'yojmua' pué'een, siahuá'astyaj i já'muahuasimua', ji'nye a'yaa pu tya'ráanajchi i tavástara'. ²¹ Siajta mua'aj, mu siaj hua' huásimua' pué'een, caxu hua'jaaxiejtye'ej i juyójmua', mej mij quee je'ej tyóomuajtyej.

²² Siajta mua'aj mu siaj tyí'ijtyi're', siata'aj néijmi'i jin hua'rá'astijre'en a'íjma i maj tyajá'mua'ijtye' íiyan i cháanacaj japua, caxu a'áa siana'aj mati'ijta a'íimaj já'muasejra, siaj sij tyámua' hua' jimi eenye', sulu a'yaa xu tzáahuatyí'ra'aj jin huárinyij, a'íjna jime' siaj tzáahuatyí'ra'aj jimi tyí'cha'ij i tavástara'. ²³ Néijmi'i je'ej siaj tyi'tíj jin ricij, a'yaa xu huárinyij tzáahuatyí'ra'aj jime', a'yájna siati'ij tyá'huíire' a'íjci i tavástara', ji'nye caxu a'íjma huíire' i tyétyacaa. ²⁴ Siajta a'yan tyá'mua'reej ti i tavástara' jamuaatá'sij je'ej ti tyi'tíj tyajá'muaci'tyij a'íjci siaj jaamué'tij. Ji'nye mua'aj xu jahuíire' i Ciríistu' i ti ja'muavástara' pué'een. ²⁵ Ajta a'íjna i ti je'ej pua'aj ricij, a'yaa

pu cha'taj je'ej pua'aj tyá'ci'tyij, ji'nye juxa'aj xu'uj een i Dios jimi.

4

¹ Siajta mua'aj mu siaj tyihuá'ijtye', siata'aj tyámua' tyihuó'cha'iin i maj ja'mua jimi tyí'huiire' siajta a'yan tyihuo'tá'an je'ej ti tyi'tyéevijtij. Xo'támua'reej ti i tavástara' tajapúa ti já'sejre' ajta mua'ajmaj tyajá'mua'ijtye'.

² Siata'aj a'náj tina'aj jahuoocaj i Dios jimi, tyámua' xu'uj tyitya'tanyéjnye'rij siajta tyé'tyojtzire'ej i Dios. ³ Siajta a'yan tyá'huoocaj i Dios jimi ityájma jime', ta'aj ij i tavástara' taatáhuire'en tyej tyij huó'ixaatye'en i nyúucaria'ra' tyajta a'íjna i ti ju' avaaaj i Dios jimi, ji'nye a'íj nu jin eetyánami'. ⁴ Siáahuoocaj i Dios jimi nyéetzij jime' nyej nyij amitéeria'can jin tyihuó'ixaatye'en, je'ej ti nyéetzij tyinaací'ij.

⁵ Tyámua' xu tyityetyúucha'íij a'íjma jimi i maj quee tyá'tzaahuatye', a'náj tina'aj xu xá'puí'rijcaj. ⁶ Siajta a'náj tina'aj tyámua' tyí'xajtaj siajta naa huojomua'raj, a'yaa pu ajta tyúuxie've' siaj tyámua' tyihuá'ixaatye'ej séej siajta séej.

Hua'tyojtye' i ti jin ja'antypuá'ritye'ej

⁷ Ajta a'íjna i ta'ihuáara' Tíquico i tyaj jéehua jaxie've', a'íi pu nyaj jamuán tyámua' naa tyí'huiire' i tavástara' jimi, a'íi pu'ij ajta néijmi'i jamuaaté'eexaatye'sij je'ej ti tyí'nyahuiire'. ⁸ A'íj nu jin ja'mua jimi jaata'ítyij, ta'aj ij jamuaaté'exaatye'en je'ej ti tyí'tahuiire' ajta je'en ca'nyíjra'aj jamuaata'an. ⁹ Onésimo pu ajta

jamuán jo'mej, i tyaj jéehua jaxie've' a'íjna jime' ti tyámua' naa tyí'muarie', ti ajta ja'mua jitze ajtyáma'can, a'íi mu néijmi'i jamuaaté'eexaatye'sij je'ej ti tyi'tíj tyí'tahuiire' iiye'ej.

¹⁰ Ajta a'íjna i Aristarco ti ajta nyaj jamuán eetyánami', a'íi pu ajta já'muatyojtye', jamuán a'íjna i Marcos, i ti nyoosájra' pué'een a'íjci i Bernabé. Xu'ríj mua'aj jamua'reej je'ej siaj huárinyij a'íjci jimi i Marcos, tipua'aj jamojo'vá'muaarej tyámua' xu tyeetyéjeevej.

¹¹ A'íi pu ajta yajá'muatyojtye' i Jesús, i maj a'yan jatamuá'muaj tijin Justo. A'íimaj mu a'íin pué'een i maj Israel jitze maj ajtyáma'can, i maj nyaj jamuán tyí'muarie', tyej tyij huo'té'exaatye'en i tyeítyee je'ej ti tyí'een jo'tij i Dios tyejé'ijtaj, a'íi mu jéehua tyámua' tyinaatyáhuu. ¹² Ajta pu i Epafras yajá'muatyojtye', a'íjna i ti tyí'huiire' i Ciríistu' jimi, ti ajta ja'mua jitze ajtyáma'can, a'náj tina'aj pu jahuoo i Dios jimi ja'mua jime', siaj sij mua'aj tyámua' eenye', siajta a'yan huárinyij je'ej ti tyá'xie've' i Dios.

¹³ Nyáaj nu tyámua' tyá'mua'reej siaj jéehua jitzán juxie've' a'íjci i Epafras, ajta a'íijma jimi i maj Laodicea já'ma'can, ajta a'íijma jime' i maj Hierápolis ja'chej. ¹⁴ A'íjna Lucas i ti tyí'hua'tacaa a'íi pu ajta yajá'muatyojtye', ajta a'íjna i Demas.

¹⁵ Siahuo'tatyójtje' a'íimaj i ta'ihuáamua' i maj Laodicea jo'cháatimee. Siajta jaatatyójtje'en a'íjci i Ninfa siajta néijmi'caa i maj jusí'rii jo'tij ja'chej a'íjna i Ninfa.

¹⁶ Siatí'ij mua'aj jo'jíive'en a'íjci i yu'xarij,

siata'aj jaata'ítyej a'ájna a Laodicea, mata'aj a'íimaj majta jo'jívve'en, a'yaa xu siajta mua'aj tyo'jívve'en a'íjci i yu'xarij Laodicea ti já'ma'can.

¹⁷ Siajta a'yan tyaaté'exaatye'en a'íjci i Arquipo tijin: “Tyámua' paj huárinyij a'íjci jime' je'ej maj tyimuaata'íj a'íjna jitze ma'can i tavástara'.”

¹⁸ Nyáaj Pablo, nyáaj nu tyajamuaata'ítyi'ri' a'íjna i nyaj jo'yú'xaca' nyamuáca' jime'. Xo'támua'reej nyaj eetyánami'. Che' i Dios jéehua jamuaatyáhuire'en.

**I nyúucarij ti jájcua ti a'ijna á'xaj i
Tavástara' i Jesús ti Ciríistu' pue'een ajta
Salmos**

**Cora, Santa Teresa: I nyúucarij ti jájcua ti a'ijna
á'xaj i Tavástara' i Jesús ti Ciríistu' pue'een ajta
Salmos New Testament+**

copyright © 2016 Wycliffe Bible Translators, Inc.

Language: Cora, Santa Teresa

Contributor: Wycliffe Bible Translators, Inc.

All rights reserved.

2020-11-30

PDF generated using Haiola and XeLaTeX on 21 Feb 2024 from source
files dated 29 Jan 2022

4f03662f-a4e0-5c7c-a13b-0b7002b5b8f6